

魏

叔

子

詩

集

魏叔子詩集卷之五

七言古

寧都魏禧冰叔著

男 世侃直士編次

門人歐陽士杰遜萬較

古意

佳人倚闌干拈鉞刺花柳西風下黃葉吹向纖纖手
手持落葉歸洞房對此秋色怨青陽淚落黃葉生幽
光

烏夜啼

東山有樹樹棲烏寒月欲落烏夜呼自言樹樹烏將
雛雌烏啄啄哺且翼雄烏上下不得息羣雛長大爭
逐飛烏老卧巢還得食一春一春啼落花養子不大
烏啞啞明月梨花子滿樹山猿抱子來朝暮但願得
食哺雛烏不願烏成來反哺

江南弄

浦水何深深菖蒲高欲沒空上采蓮舟蓮葉不得出
不愁水深蓮葉稀愁無蓮子君苦饑

立秋日同諸公勺庭常桃有懷彭躬菴友兄季

弟和公

始秋之日日愆陽高樹之陰移石牀諸公當午時過
我披襟散髮延新涼門前桃樹紛的皪垂子低枝拂
巾幘晨起呼童抱竹筐山日未來乘露摘貯之何以
白石盤濯之山泉青琅玕新香拂袖隨手勞齒牙歷
歷明生寒我友嗜此如不及我第一餐能百十興來
大嚼當中庭諸公但可從旁立今年二月同看花山
庭近水明如霞人去不知花已實思君在苒空年華

一嶺之南一江北渴當何飲饑何食庭際清風吹葛
衫樹上鳴蟬日垂夕

屋後有松栢

屋後有松栢屋前有桃李桃花李花花交枝遠託青
松心所私願將松栢贈桃李花落葉生長結子

瀟湘曲

君家遠住巫山曲妾家新臨湘水綠湘水之上有雙
妃開門日見青青竹竹葉何青青竹竿何歷歷洞庭
多秋風日莫搖山屋

同門人蕭子潛自栗園過泊林訪無倚師口號

却寄

清秋好日兼好風却攜小阮訪支公平岡盡長青松
樹短堤正開紅芙蓉平生鹵莽不學道但覺幽人相
對好清磬一聲香飯來舉箸落箸直一飽昨夜盪船
池上游青天如水月如舟主人牽衣儼且別莫負今
夜池頭月

大風

庚子孟冬作

嚴冬黑雨漫山谷大風怒起夜發屋知汝來自三千

里三夜三日吹不足山木飛石并威勢靈恠翕習往
來倏忽蟠空際下帷慄栗擁被卧如見霹靂烈缺施
鞭而吐火鳥不敢晝飛鼠不敢夜跳雞犬伏縮不吠
不叫哀汝北鄉之人兮盜賊被裘帶劍以乘馬良民
繫縛老母穉子散離竄伏于山野大將受降千夫供
億饑者不食勞者不息稼黠點以棄路草枯黃而餓
陌火獵獵以燒山獸挺挺而慘日雪奄奄其飲下笙
歌杳靄嘹唳而聲沸哀汝北鄉之人兮大風怒起夜
發屋嚴冬黑雨漫山谷

賦得老驥伏櫪志在千里

高天颯颯吹涼風，
箐鷹怒翮睨秋空。
擘斷黑絲飛不得，
老馬伸頸鳴皂中。
皂中之馬千百十匹，
老馬一鳴羣馬辟。
易羣馬飽食豆，
與芻老馬終夜立。
伸頸向人呼一食，
一石粟棗脯爲穀。
露牀宿天生是物，
必有爲安能禮數空拘束。

中叔云齊安重耳吳翼玄德樊噲之諫沛公趙雲之對先主者此志也

金精行

長沙鐵甲屯逕口，
翠帶花旌動楊柳。
玉驄斜駕七香

車路上行人盡回首麗英家住此村落不愛鴛鴦愛
猿鶴石苔爲髮蘿爲裳日采松枝煮丹藥烏飛月落
洞門開平明車馬爭入來冉冉被髮出峰頂三軍悵
立百花臺臺上日日雲波屬臺下年年春草綠風雨
夜深山洞冥鐵鑿餘聲出空谷

庚子長至日

五陰剝陽陽不復蒼梧之東東日沒一雨一月不肯
乾一日乍晴十日黑侵晨整衣向東拜我思蒼茫竟
何在浮雲瀾漫滿空山春日不來時不再

時不再來心煩冤析骨裂膚寒威煎冬深霜雪灰不
然故春之去如逝泉哀我後生長霜雪不識人間有
春日

慈烏篇 示門人

解云四字鄭重發人深省

在昔聖人出御世後苑之樹烏翔起朝飛暮飛自求
食得食輒歸哺其子詔曰烏之鬻子閔如斯嗟汝羣
臣從朕遊欲歸養者今日始哀哉二百七十年黑烏
赤足滿萬里臣有山中茅屋二三間不種檳棘種桃
李桃李上巢老烏哺翼之兩烏子鴟從北方來爲言

山南五百里上有楚茨叢下有爛羊尾鳥子聞之不
顧老鳥爭飛食肉噫嘻嗚呼鳥子爾幸不逢曹王臯
關弓挾矢覆其巢

新晴歌和伯子作

伯子歌新晴恰似新相知一見之間樂難極猶然
是此尋常人相看無非好顏色云云

新晴恰似舊相知十年一別無消息我亦飄飄客異
鄉古道秋風竟相值桃花李花雜春草風雨勾庭春
忽曉恨爾相見何太遲喜爾相逢似太早

聞雷

黑雲橫起壓赤日熱氣偪仄排窗入震雷一聲起殿
壁北風南風吹雨急屋瓦亂落搖屋極東西馳擊如
有物嗟爾天雷久已無神奇焚燒豐草索狐狸我有
一尺方石枕無爲白晝驚我寢

平西走筆寄甘健齋轉呈張曲江明府

甘子壁上詩慨然想見君有奇甘子辟世東牆下君
數顧之何所爲其日示我一長篇上傳山西巡撫忠

襄蔡公賢

公諱懋德號雲怡南直隸
山人甲申死闖賊之難

後有論贊三百

言睢陽之烈千古傳

公貽周公遇吉書
有此睢陽之烈語

張君傳如韓

退之附載中軍應都司

應公名時盛

凜凜南入好男兒方

伯名與許遠齊

趙方伯建極罵賊不屈凌遲死

更有寧武周將軍闔

門戰歿無子遺感公貽書自憤發愧歿賀蘭不出師

周與妻俱蒙古人城破手刃巨賊百十人身中數是

十創歿妻率家僮百人焚舍巷戰迄歿無一降者

威云帶盛在此非出有眼而追殺法更自持神

時蔡公奉旨已解任力戰十日城破自經三立祠

瘞身輕不得歿時盛乃脫鐵甲加公衣歸家手殺子

與妻再拜屍前經樹枝門皂廝養二十餘祠前樹下

屍纍纍我同林子讀至是默然無聲淚雙垂吏部曰

然心傷氣盡下經接解任之故馳驟斷續是史漢

公用人侵我吏臺省曰公儒者不可使國是日非士

解體傳中一一詳其事乃知張君不獨愛忠臣能見
大計有如此我翻案上書明季遺聞多刪除林子拍
案大叫絕何人今能爲此說甘子拱手君莫疑此亦
張君之所爲朝出城西門甘子送我乘桴行江風颯
颯吹白蘋石瀨迴薄濺衣巾悔于南豐不識君

贈熊見可

名兆行視名應鰲
字仲立俱樟樹人

力餘於物能舉物氣餘於事能勝事愛汝精神大於
身溢山須眉如沸水廿年高節卧石門一載利器試
延津忠臣自古無餘祿丈夫天性懷舊恩君之好友

祝仲子其人沈練有思理謂君作事多剛疎以我觀之信有爾

快哉行贈余生

快哉我得與生相遇執手不辨新與故問生何官執金吾錦衣橫帶王前驅問生何業詩與書大言小言如散珠甲申三月天柱折椎牛擊豕衣濺血座上少年皆背裂我聞曾止山老生醉後作長吼三尺五尺樓上囟歛忽跳擲若無有我今見老生汝身不過中人身胸中五嶽何難平我欲飲汝一斗酒狂奴故態

今在否

拙哉行爲葉子作

有序

葉子之父死義者也葉子悅蜀人余生與游五
嶺勉以義既見吾季子遂舉所學制舉文立焚之
壬寅六月余相見南州因道前事以礪其卒葉子
曰吾何以見吾朋友作此徵之

拙哉古人車乘翹翹招以弓欲往從之畏朋友前有
鏗鏘激楚之鼓鐘後有窈窕澹蕩之冶容剗糟穉麥
烹巫雍蒻席雕塵宮蛇龍翩翩得意如御風拙哉古

人塞裳去之不敢從噫嘻古之朋友一言相爲歿下有黃壤上蒼天日月祖考實聞此

邦士云本以忠孝相勗詩中不及忠孝一字獨斤斤畱連在朋友一言末數語真古朴拙意格俱高
登望湖亭壽楊永年五十初度

我生四十不識湖夢中乘船常大呼一到吳城上亭望左揖彭蠡右匡廬吳城之市有楊子二十年前開高義只今便成五十翁顏赤髭烏心獨喜最愛秋水涵秋山夕陽風急漁艇閒恨汝百川不灌河青洲宛委隔烟波明年二月春雨集與君把臂亭上立湖水

搖蕩日月馳想君磊落年少時

歡喜亭老僧

亭在廬山之半老僧
十年後竟坐化于此

歡喜亭上有老僧短衣窄袖號玉明入門不識新與
故又手出戶笑相迎我當七月肩輿上路逢陡仄下
輿行療饑已煮菘豆粥消暑還蘊苦瓜生八年以來
盡如此與之一錢不肯承令我對此不覺飽放飯大
啜無吝情

石松詩贈日公

有序

五老之陰日蘭谷僧日談與師旭巒結廬其上壬

寅七月余同林確齋造之自歡喜亭東折數里下
谷水石薄嚙松杉萬樹仰視空濛日光微下十步
之內亂趾易面又經數里瓦出水際乃及門焉時
旭師暫出相見日公于堂旣說姓字肅然拜興堂
北積石叅叅蟻而上有松門並植石橫卧如限日
石戶戶外多盤石平如掌凸如拳松錯生之曰巢
雲松根並緣石罅不著寸土高五六尺短者二尺
下悉可坐卧大約數百歲千歲物也松短毛勁如
怒虎須枝輪蚓結或端直層起如偃蓋斜如雲曲

下平上如椅牀几根枝蔓延如石上苔蘚或橫嵌
石中一二尺佶突上之日公曰歲大旱松著土者
毛黃萎石上松蒼翠如平日吾聞旭師堅立不撓
身衣食其弟子日公足不下五老峰者十餘年而
此石松方千百歲無知者是石也多幽蘭松蘭之
間杜鵑尤盛魏叔子曰師似石松似日公日公之
友似蘭而杜鵑則且奚似繫之以詩

五老之陰有精廬松石絕與人間殊天下凡毛皆踐
土此松以石爲瓊車雲霧厭浥濯其毛風雨歛忽盤

其株衆草視之不敢偪獨有幽蘭相與娛四月杜鵑
花不絕山後山前衆芳歇萬丈壑底衝風吹石上松
蘭赤如血

赤岡二查歌

赤岡在匡山之麓大查天球小查小蘇

大查吸吸如匡山小查漚漚如湖水二查不知何者
賢但聞其人十九年小查禿爪兼折角朝游蒼梧幕
碧落大查塊獨處戶庭躋足強項不愛生煜煜烈烈
動神明小查身入虎穴與虎爭噫小查實爲之逡巡
不使大查知前日扁舟下豫章小查訪我古南塘其

身不滿五尺長樸率有如田舍郎今朝大查出揖客
匡雲初開日正白我見二查皆下拜大阮小阮直奴
輩

早發華陽鎮

七日五日阻北風江頭白浪高於篷中秋夜泊華陽
鎮琵琶琥珀聲瓊瓊月高鷄啼夜當午官船吹角起
擊鼓不聞江上人語聲惟聞滿江動檣櫓北風漸軟
江水平高帆一一出前汀估人利涉爭及時何能熟
寢待天明披衣出船望江月波黑天低光明滅夢中

每愛放江船月落空江叫鷓鴣

揖黃君

高郵城外水連天高郵城下齊泊船城裏有人持書
至船上反側不成眠舟子三更起埋檝送我獨上堤
頭立五尺以外皆波瀾僕夫趁月負我涉蘆中老父
起呼稀問汝半夜欲何爲逡巡借得牆外坐泠泠風
露沾我衣身寒背倚濕蘆葦腹饑口嚼乾蓮子西頭
之月不肯落東頭之日不肯起須臾聞說開重門短
衣垢面揖黃君

廣陵別徐子山

飛鴻遲遲來掉入青烟路遺音在風中適與歌聲遇

四語子山感興中句

余每閒中歌此句撫須微笑若有悟祇餘

青眼在空見白須稀

二語子山病中句

老狂病語出天真心

長身短知者希去年入月客黎水見君壁上詩數紙
廣陵秋老菊花開客中逢客却在此明日別君去共
君今夜坐天高霜氣深無言對燈火居隣北郭帶邢
江明夜濤聲一思我

上江行

長江捲水如推輪黃雲黑雲屯天門大風揚埃迷前
津橫船獨進負勢奔舟子競力各爭能指揮不應力
不均舟中面面皆失色風聲水勢相吞射但見破船
敗席沈江中亂捲黃沙灑蒼荻噫嘻風波反覆在頃
刻噫嘻風波反覆在頃刻禱祠恐懼何所爲默然內
省不自得

贈愚菴和尚

師名明孟
號三宜

愚菴老人無枝葉叉手獨向蓮花立
日莫放船過花塘西風吹須白習習昔年曾見虬須僧知公於世大

有情衆生不度不作佛坐看西湖春草生湖上蓮花
成阡陌花葉出水都一尺獨有愚菴門前花高於湖
心七尺石

贈胡彥遠

熱風日夜吹湖水獨坐高樓窗不啟有時劃然雙戶
開西湖南屏入窗裏我時迴首錢塘城有人抱膝忠
清里下牀負劍倚青童入座磐折馮玄几

時傷責困甚雙

眸炯炯對客談意君當是天下士選材語愛李英公

彥遠論人事業兼
詩貌福壽者

藻鑒人推崔刺史用人不與擇交

同我意云然君正爾朴槩須知周鄭名清濁莫分正
渭水高冠方袷憐習儒繡虎雕龍鄙餘子君不見日
下雲間會坐時勿爲常談只如此

青門歌贈王滄厓

延秋之鳥啼秋原齊宮之犧犁春田青門種瓜大如
斗市上那能值一錢秦郵公子何翩翩爾雅風流真
少年拂拭埃塵光瑚璉世人抱薪炊熱釜君燒灰
灰欲然長安萬里風雪天紫貂毛落折雙蟬南望鶴
巢飛不前資君羽翼高騰騫更於黃山一遺老見汝

覽揆之贈言朝霞的灼赤城邊天潢屈注滄海連我行拂衣歸雲烟此中頗有胡麻飯君來食之壽十千

寄壽嶺南何母七十

伯子衡字左王仲子絳字不借

吾友之母如吾母吾弟之友如吾友北田三月梧桐花左衡右絳捧春酒我生四十不游粵此中五子神交久定知是日陳陶梁獻酒一卮詩一首盡道二子之賢阿母賢伯能家貧閉戶居仲能母老東西走惟母生當萬曆初至今始識天地厚去年黃山七十翁三千江水親爲壽人間不少隆萬身所愛此翁真壽

考城南曾子最相知荷擔獨上梅嶺道我持清酒一
壺勞汝足好及良時慎弗後

壽吳門陳崑良司馬六十

四十我已衰六十君尚壯疇昔聞君名思君在天上
我往尋梁鴻廡下不知處君却來金精仙女已飛去
我歸金精君入閩三月見君梅川城攜得蘭本如搢
劒紛若好友羅中庭我之四十歸草堂君之六十依
僧室如君自是四海身不宜爲主宜爲客

讀鄧南津天寧廢寺詩因感白鹿洞書院作

天寧高寺臨古圩昔日繁華今荒蕪深殿無鐙鬼晝
呼馬矢三尺延殿除扈斯爛慢睡咄咄鄧子過之三
欸歔歸作長篇刺苾芻前年我行游匡廬五老獼猴
扳山狙力盡玉川足趑趄恭聞白鹿麓南隅先聖先
賢遺令模從之不憚我僕痛白日欲落啼野鳥松陰
竹陰光縹緲入門登堂色丘墟至聖戴板坐中區弟
子潦倒班兩廡丹粉剝落紛頭顱冕無綴旒纓絕鬚
叩頭再拜起躊躇不敢久畱張足趨噫嘻白鹿白鹿
多生徒秋稼登場復何如但聞諸村昨日下午官符皂

隸分頭微洞租

口號送黃孝廉歸楚時房竹新破

愛客愛楚客楚客多豪雄愛水愛楚水洞庭多悲風
彭蠡具區了不異人意乃知天地多雷同我會泛白
馬喜無湖邊山不知此湖濶多少但見飛鳥去不還
側聞洞庭湖青天爲盆日月浴生不上岳陽舫不眠
雙目楚水楚水風不波楚人楚人今若何

紀夢

夜與諸生講論策一生之語殊大惑我從上座厲聲

問汝今溫飽誰之德揚眉張口發至言一座之人齊
悼息寐成獨見林确齋兩人相與月下立仰望月形
變飛鶴頭足嘴翅光歷歷旁有綵雲繚繞之恰似官
人補上物忽然兩日懸西隅一大一小明明出我將
一手障左眼獨以一眼看新日走入內室白徵君徵
君卧起覓雙鳥我時跪執徵君手今年天變良已極
時平物賤歲屢登不覺痛哭聲俱失徵君云汝輒如
是是維乙巳十月夕

題方九臯蘭譜

有序

物以少貴非至美也至美者使盡人間皆是物終
不得賤方氏九臯譜蘭百種形態各出然極天下
堂室山谷所有九臯雖累紙萬幅不能盡詩曰
荆棘一枝嫌其多蘭花百本嫌其少物生所貴自爲
芳不向人言亦道好億翁畫蘭不着土九臯畫蘭必
傍石安得天下蕭艾盡化蘭忙煞九臯畫不得

贈新城涂宜振五十

天峰之陽有美子腹何便便須纚纚口銜酒杯不肯
醉廿一史如瓶寫水行年五十未徵蘭獨上花樓看

遠山興來寫入詩中書屋裏白雲相往還翠微坐對
雙桃石手把春醪遙相憶雙桃飛渡黎水濱天風一
夜長見孫

送越辰六之楚兼游廬山

我昔曾登五老峰青天無雲朝日紅第四峰頂枕石
臥江水湖水分西東大江東下翻日影回首楚山烟
冥冥獨恨我無千里目直望洞庭波萬頃讀書不讀
兔園冊交友不交鄉曲人觀水必游洞庭湖看山必
上玉川門楚水多皐蘭匡山多黃精松根茯苓如斗

大問君藥籠攜未曾

題宋射陵蔬枿

藝蔬亦有道菜窩植韭以爲君治圃亦有法縱橫不
亂如部軍重後輕前謝機智一心負在何殷勤種之
貴土宜用之貴及時卽此經物有深理聖人何以小
獎遲我本南州士常游東湖曲雲卿廢圃至今傳歲
歲春風春草綠嗚呼古之小人今大人試看蔬枿霜
雪後青韭黃韭何時時

吳門六月歌

吳趨市上人如烟大雨十日日衣綿夜擁絮被塞兩
肩五更雙足猶連蹤我居城市尚如此況復千山萬
山裏誰道嚴光爲好名五月羊裘釣烟水

夏雲 丁巳作

秋雲橫夏雲直春雲重冬雲一四時雲氣無端倪惟
有夏雲最特奇日邊滄波平天際青峰突波濤洶洶
起層樓峰巒矗矗如立筆兩峰對峙不相聯平橋橫
架人接跡或有好女垂雙鬟或有巨人持大戟身騎
高馬戴兜鍪戈矛相撞如殺敵獅子蹲跳熊羆號獸

駭禽奔勢相偪大叫奇絕呼人看倏忽形態已改易
有時雷聲殷峰中金蛇閃爍時出沒用兵譬淮陰分
合不可測爲文譬子長堆奇恣胸臆惜哉此雲不致
雨四海何由被潤澤

丁巳十月夢中聞鼓聲甚妙得二句續成贈契
公

長夜霜嚴天不曙老僧夜起自擊鼓我于夢中問妙
音不減劉琨獨起舞一擊暴雷起左方四壁乍欲摧
屋梁再擊三擊音節換殷殷聲轉南山陽草枯月黑

夜如此時聽風聲雜澗水不斷有如練雀飛少停忽
爾蒼鷹起欲停不停故盤桓未斷將斷聲團團窗前
乍覺西風動天上遙知北斗寒四海幾人夢初覺爲
牧爲王稱極樂安得借君法鼓催朝嗽一出繁星落

蕭孟昉初營滕寓予適來客賦二百二十四字

研隣先生天下豪千金萬金比鴻毛眼底每嫌五湖
窄胸中時有五嶽高能于城市生丘壑一泉一石隨
意作到處敗場與童山青林一夕蔭高閣春浮遜園
不稱心研隣窈窕殊晴陰兵火歸來頗荒落隔江暫

住旃檀林圖書滿架竹滿寺叉手間行聊適意望江
欲起白玉樓從僧更乞金沙地杵聲不絕鳥亂啼清
風天外來故知一別八年還相見君大黑須我白髭
謂我曲闌種芍藥修廊斜帶池心閣欲試前山高未
高自上梅梢俯寥廓大江潏蕩小溪清晴林隱隱見
層城更結幽房二三個春蘭秋菊間茅亭萬馬渡江
日不止晝閒且自攤書史古之達人良有言何用爲
樂心所喜

口占答楊友石

時戊午
十二月

有木得爲先生棺有藥得卻先生病生平金帛耗幾
何如此二事金之幸懷哉古難衣食人不然夫子豈
長貧於我猶非盜蹠樹獨無囷粟指與君天寒作客
殊草草冰雪堂中寒正好友石名所居
水雪草堂自笑虛名累
此身無端風雪章門道

題蕭小圃像

君向何處來更向何處去一杖拄雪根踏破青莎路
知君方寸有桃源紅花綠樹紛無數小圃好佛故
首二語云云

魏叔子詩集卷之六

五言律

寧都魏禧冰叔著

男

世侃直士編次

門人歐陽士杰遜萬較

初過冠石

乘輿偶相過山花處處然欲尋偕隱地正值晚秋天
往路溪流得開門石竹偏主人勞種蒔荷鋤立渠邊

登蓮花山

百折山泉出千尋石磴通孤篁秀陰谷高鳥入寒松
雲物長如此樵蘇竟莫逢秋心向空外迢遙一聞鐘

東岩歸作東躬菴確齋

盤谷羣峯入歸途望轉迷殷勤謝我友相送石橋西
疎樹高原出寒花野徑齊到門還倚杖獨立向東籬
過馬嶺遇雨

曉過馬嶺道芒屨欲平雲萬木鳴泉合孤桐石峽分
羊腸間坂塞熊耳想鱗吻風雨一時下微茫失遠村

同曾止山宿冠石

結髮爲朋友於今二十春
翻嫌體素異故使往來頻
霜氣下茅屋寒光生故人
時聞東作者鬱鬱動柴門
獨行山閣見落梅歸命筆
墨卽樹下賦

春氣一何早東風盡日吹
獨行疎竹裏時有斷香隨
高閣迴虛照空堦見落梅
佳人殊未至此意當語誰
躬菴云末二語狂老惱不徹
只顛狂選其閒遠

蕭蕭蒼壁上一片落寒枝
冬日佳無極山中清若茲
羣蜂分逐艸孤鳥自銜池
相對籬東菊衰榮感異姿
躬菴云三四高渾五六幽細
是梅詩絕唱

同謝亭三會止山過林夏叔看泉上落花盡日
愛爾真棲隱春閒載伴過鳥啼山路轉花落石泉多
地僻餘芳艸人幽長薜蘿何能不取醉新月已庭柯
婦病

足悲清鏡裏忽忽向秋徂十月霜經菊五更風落梧
愁來憎衣帶怨往怯啼烏共對空山火躊躇此夜孤

伏驥

有序

余有石印自東粵來紐作伏驥怒齒矯顧欲起鐫
其面曰老驥心千里美人天一方意氣之合輒以

貽人夫寶劍贈烈士悲哉

粵東來伏犧代北實空羣久臥原非石觀之疑有神
相皮輕國士畫肉亂天真神物終當去江南艸正春
不寐

秋山風雨夜百感動雞聲反側成終古躊躇向此生
草蟲依板屋竹葉下臯亭直待虛窗白高眠未肯醒
余有寒溪聞落木衰艸出行人之句羅飯牛爲

作画復賦

左折西橋路東臯連翠微誰將一幅紙寫余心所思

松下聞聲處溪前獨立時寒光看不盡日夕秋山知
送任道爰同諸子勿剛歸九江

天下少知己寒山多苦音欲將千古事贈子十年心
前路風霜滿故鄉煙水深莫勞劉子驥遲汝桃花林
寒雨見松間桃花感內人病

溪上桃花樹栖栖暮雨中愁心寒對水弱質獨依松
是亦分春氣何堪但落紅不曾貪結子空待五更風
病臥聞月想湖上作

曾聞湖水夜月色涵秋清欲駕煙中艇直來湖上行

數峯生杳藹一片沒空明何意仍衾枕殘燈暈已生
弟云起十字寫湖水秋月一片渾淪却便是想作
妙絕○又云第六句鏤刻難狀之景高渾精工試
問空明如何沒而曰一片沒空明詩有不可言解
可意悟者此類是也

客寢牀蚤可掬戲呈主人

千人辭拂拭致爾特猖披似鬼躁難得如蠶螫易施
慈因懷蟣蝨虐已甚蠶蜃坐待朝光出捫之無孑遺
勺庭冬夜聞林舟之彈琴

悄然成獨立何處直鳴琴寒月不肯落遠山時有音
松間白露下池上夜泉深曳杖還歸去蕭蕭風滿林

冠石草堂值溫晉上

愛茲風日好十里過林逋
雨後泥侵屐山深花落鉏
論詩蕉葉酒當飯瓦盆蔬
及伴將歸去却逢君到初
金精谷中遺冠子戲成口號

東門無事掛西谷日尋歡
遐想孟君宴空慚范氏冠
折寧名士慕側可吏民看
禿髮應難任科頭且自安
山居日斫大蕉一葉代紙
偶書貽危習生

好友如君少秋清正在茲
比來頻見面別後輒題詩
白日高亭午綠天陰滿池
偶然庭際立書此一相貽

夢徵君扶病拜先祭起欲輒絕哭壹而寤

先子昔承祭瀕危不敢安七年猶入夢一痛直傷肝
伏臘非王氏威儀自漢官南門原上草夜夜北風寒
徵君生平最篤奉先疾將革惟屬祖祠事捐館前
二日值太母冥誕命扶掖祭拜弗勝數頓首起

湛田寄曾止山

輕陰連數夕山木已蕭然時聞石澗水響出清秋天
獨立遲歸鳥平烟下去船恨無雙鯉發寄此到君前
勾庭望月別胡心仲

秋色肅然至空山月色真近來愁久坐此夕直同君

高露下梧葉寒蟲依草根未知明夜月杯酒向誰論

秋夜廻文

愁覺不眠好榻移月影穿秋庭半在樹碧水一於烟
頭白親花塢眼青對竹園浮生此倚徙過鳥任翩翩
賦得老驥伏櫪志在千里

克國馳金城文淵下武陵飯多來譖口酒少得威名
洞股齊高帝白頭減伏生磻溪日落處一一欲揚鷹
中叔云詩欲脩體故專取末語立格

庚子十月得蘭花山中采置草堂率成二首貽

胡心仲

冬來多暇日信屐到蒼崖落葉香吹路披榛花拂衣
誰憐當歲晏移植向茅茨歎息十餘載幽芳今始知
月色霜中靜夜深山氣寒愛之心不足移燭坐相看
影對菊當案香分橘在盤雖然辭枳棘異患莫能干
登日峯

不見扶桑國登臨只此峯因之分晝夜直欲破鴻濛
樹隱羣山外烟浮萬井中天風自吹息未許白雲封
同友人之資聖寺訪木大師留宿賦呈

三年建行杖十里望松陰爭識先生面誰知後死心
蜩空承向樓舟欲覆觴涼夜半聞烏鵲孤飛祇樹林
過劉氏竹園同林確齋駱樵客江玉仲 十首

曾上天峯寺還過樵客莊遙知隔嶺樹下有好事林塘
路仄時聞水竹深不見房主人能待客裸袒亦何妨
旅中真畏暑觸暑訪名園小徑曲依樹方塘平注泉
偶來石上坐倦倚竹根眠客夢何曾醒蕉尊已到前
濁酒不辭醉竹陰全在亭涼風隨客坐殘葉落空瓶
晝靜心如水平菱蘆齒欲冰坐中逢熱客雜遝起新聲

蘭花吾愛汝尤愛樹中蘭不見已多歲相逢在此間
性能移酒味香豈共花殘欲乞金錢買翻愁歸路難
種樹多佛手樹樹列清渠掌指拳都肖色香味竟殊
可因玉友至不使木奴俱林子曾貽我祇今一尺餘
池館佳如此到來心已清自憐多肉食猶覺少幽情
石轉高低路竹成長短亭北窗開向處應有讀書聲
草法連上
更上一層去江城引望遙春風開萬戶秋水落雙橋
野艇竹根過行塵草上消不知明月夜此處肯寥寥
我住小亭子依山不必深近栽花外竹遠見樹間岑

對此怡新好何如返故林秋風且莫發攪我客中心

亭前分井水堦下少茶爐樵客相邀去當軒盡一壺

短牆依薜荔小草雜蘼蕪章法連下便向花陰浴頭蓬不暇梳

振衣出石戶躡屣過長堤共說園中勝無如池以西

空明羣樹見平遠一峯來不覺月當照有人橋上期

時玉仲先歸期

下橋上待月

邦士云欲與老杜何氏園林比勝
兄云起結處洗脫蹊逕居然爭勝

蛙鳴

積雨新晴日鳴蛙薄暮時自來當鼓吹我欲問公私

二語化腐爲新最是工巧

躑躅青莎路浮沈白石池却傳蜩蚪事緘口慎人知
弟云寄托深切不得草草讀過

晚泊南康

峯高青入水湖濶白浮山野鳥飛難渡人生到此閒
遠船乘夜月縣火倚重關枕上支更卒終宵自在還
登左蠡樓

湖光晚不盡涼月正當樓遠嶼平烟沒明燈接樹流
艱難成客路天地入虛舟欲逕洞庭水蕭蕭木葉秋
宿萬杉同剖公雨後觀泉

行年將四十今夜宿匡山寺憶前朝勝人如此水間
暑風消雨後客路入秋殘何事東林日攢眉竟欲還
自匡山過陶彥存宅

主人間客至巾帶出前山好雨依時下高林竟日閒
倦游疎拜揖隨意足盤餐欲覓讀書處清秋共往還
西湖飯黃米懷林確齋兼呈主人

高閣臨湖水晚涼進食輒念君長病隔愛我近加餐
撫腹誠無負用心良已難孤山會飯鶴飛去任飛還
黃米飯不停
滯故三四云

七夕寄內

西湖逢七夕北寺對孤山遙憶翠微裏有人獨倚欄
斷烟明水際初月照人間歎息真良夜年年秋未還
宿江爾慈藥室出所次百官圖占骰擲之除拜
悉依國制激勸兼有復覽佳詩率爾有作

自愧非苓朮多君置藥囊周官留六博大雅接三唐
對酌樽前酒同眠地下床無端耳熱處見此卽神傷
春早發翠微余欲輕裝內人勸余重繭日寒思

吾言却寄二首

下山纔數里衣絮已頻加我意不如是卿言亦復佳
曉風鳴斷樹薄日帶飛鴉却意桃花塢春寒上絳紗
汝病春常劇憑誰驗藥方月餘酬客倦昨暮種花忙
藥記收書麓方須檢筆床憂來倘病隔更試鬱金湯
清明日寄內

作客尋常慣那堪桃李時花當飛別路葉定長新枝
繡佛閒消病裁箋強詠詩知愁春草綠不復上前堤
竹橋桃花

庭際雙桃樹開花不自煢行來九十里纔見兩三株

山木知兵力春風感髮餘
幸逢羣盜息處處有田廬
舟過白城留飲檀水別業歸呈主人

終年愁客況此日識秋光
菱葉殘猶綠佳花落尚香
酒醇能自醉意適便爲鄉
相送西橋路平蕪已夕陽
陳伯璣爲浣君修佛事走筆奉東兼應輓詩

之子辭朝市佳人向夜臺
已明三世事還散八關齊
白紵新被體青眸舊愛才
浣君昔以
憐才歸陳秣陵花落後親
揖浣君來

贈別沈方鄴

南州纔把臂又說到羅浮海日獨來照天風吹未休
才名開百粵羈客感三秋爲問陳元孝丹崖尙姓丘
廣州陳元孝云羅浮絕壑人不能到處過望丹壁上
橫勒丘邦士三大字而禧姊婿姓字適符亦異也
同諸公歸有園看桂涂允協索賦

黃綬高秋樹香迎過客衣偶然來曲巷及伴扣柴扉
坐定風聞葉酒闌花落卮主人興不淺欲去索題詩
送友人之金陵

烟霜遲落日楓葉送行舟爲有三山約難辭千里游
牛蛇應自見猿鶴定多愁莫待桃花發春帆上釣洲

自西溪尋友人

每到西溪路客心都覺閒
斜簷支古樹隔水度青山
歌雜漁樵處人行烟靄間
清談杯茗接日落不知還
廣陵重晤余生生將歸餘姚賦別

十年我再出君尚阻歸程
瘞骨奔西蜀行裝滯廣陵
乾坤爲客老患難覺身輕
一曲鏡湖水悠悠待汝清
病痢憶內人病却寄

客況秋無賴高樓暮雨飛
畏寒添白衿養藥仗青衣
肚痛慚無帖神傷忽有詩
憐卿頻滯下長伴夜烏啼

口占贈華子三

客我吳邇久知君意氣真君如孤嶺樹我亦出山雲
白墮酒難醉黃初詩未食不辭雙屐滑風雨日相親
贈王橘庵

結友平生意年來少品題何當天下士直在夜郎西
捫褐曾無蝨聞聲尚有鷄莫令鄧禹笑珍重此鬚眉
水莊喜躬菴確坐見過

西臯羣木落風過特聞松冬日有如此松風自不同
沙明魚可數天靜鳥當中何意耦耕子芒屨相過從

寓富田偶庵贈施上人

萬方多難日何處此招提小閣雲中曲高峯天外低
鄉餘正氣在富田爲文信國故鄉宅與孝思宜上人構庵養母點綴清

秋色芙蓉放一枝

老友經年別吾徒萬里分不因從白社那得聚南村
烽火前山隔清鐘此夜聞淹留未肯去一遲右將軍
同中公避兵雲梯山庵東見見副寺

雲深不識路清磬一聲聞九曲山藏寺萬株松到門
歸牛眠露地吠犬隔花村瞻禮金容罷殷勤敘三賓

不記青山外郊原盡甲兵雲林雙槎遠秋雨一燈清
吾病憐兒輩論文愛老僧夜深松子落風細不聞聲
水雲菴贈契岩

老僧真破衲一榻任寒叢帶月春朝食疏泉煮晚菘
虛堂閒白日實相見宗風荒谷鷄聲斷深宵自撞鐘
水雲庵酬王侶薪見過

避地從蘭若顏門借薜蘿村荒行跡少樹老夕陽多
雲外來嘉客燈前共嘯歌濁醪人未醉霜氣落明河

田心訪友

一溪十九渡亂竹壓危梁樹偃青天黑草連白日黃
下車穿虎跡交手轉羊腸聞有故人在敢辭朝履霜

雪霽寄內

客況生除歲天寒及暮時雪添新霽色梅壓古牆枝
多病長愁汝有懷獨賦詩民生方日蹙且莫訝歸遲

松花

蒼松黃蕊出開遍野人家嗟爾歲寒物竟同春樹花
味堪調餽餅色可映宮紗惟有石間蘚長年綠水涯

春半憶勺庭

好鳥啼朝夢東風吹陌塵如何花開日猶是未歸人
堤柳青連水山桃紅到門夜來添白髮又過一年春
舟中贈楊叅未外兄 二首

灘聲五百里七日上梅川與子同杯酒相將忘暮年
花開眼嶺地歌唱打魚船更對巨源坐搖頭詩數篇
祖父老嫗咸于今得幾人況當吾與汝少小便相親
警咳先姑在文章令子存自憐空老大鬚髮白紛紛
寓方西城後院聞主人吟誦聲有贈

不記魚鹽市祇聞鳥雀音若添數株樹何異入山深

永巷人聲隔虛堂日影沉春風開戶入吹到短長吟

魏叔子詩集卷之七

七言律

寧都魏禧冰叔著

男 世侃直士編次

門人歐陽士杰遜萬較

己亥八月懷曾止山在吳

天涼風急萬山虛處處秋煙到敝廬聞說王吳歸戰
艦何常六月斷音書夢樵已識蕉無鹿春浪還生海
大魚念汝洞庭將木葉隨波離合一愁予

送曾止山客游廣州

幾千里路見行車，瀕海雄封此一隅。
寒雨時當五月晚，索游幸有兩人俱。
始興太守誰延士，南越老夫肯自娛。
但使千金徒送客，陸生應愧說詩書。

送季弟入廣

棲棲六月下重灘，閉戶誰知行路難。
愛汝兩年曾遠道，慚予十載只寒山。
爲愁暑雨多饑渴，但得瓜梨莫飽飢。
游國秋風容易到，五層樓上有波瀾。

黃生自百二十里就學外舅，時年十歲，里有奇。

童之目詩以贈之兼呈令尊令外舅

十年就傳遠離居石戶寒燈八月餘郭瑀有徒能坐
此伏滔作父定何如余今猶自答科舉子昔知應疑
尚書莫美人稱天下士艸廬終已愧名儒

金郝天挺厥科舉元好問從學進士業不答唐神
童高定七歲讀尚書至湯誓有疑問時余方以時
文教授而黃生治尚書
不學舉子業故及之

庚子嘗稻日奉壽伯兄四十初度

時方多難獨傾身兩弟深漸大被恩在昔家猶稱良
友只今兄已是嚴君山田獲稻嘗先寢嘉客稱樽到

石門自此追隨還四十頻來拊背問寒溫

司馬伯康年八十溫公事之如父天稍涼嘗拊背問曰得無寒乎

賦得老驥伏櫪志在千里

鹽車之下生千里華屋之中歿九龍自古窮途能復爾亦知得志難爲終毛間蟲食李天下酒後歌悲漢沛公但看老瞞垂絕日手持愛子泣深宮

中叔云昭烈臨終慷慨戒子曹瞞將歿泣涕托兒乃知帝王自有真也

別胡心仲歸宛石

逢君況是中秋近歸去如何不肯遲相送疎林日落

處已愁峰頂月明時每一見來真有得卽今別後定
無詩寄語東巖林處士酒酣莫憶魏無知

庚子九日懷彭躬庵

良朋去後空佳日況值高秋心易孤前月有書還宛
石祇今傳汝尚鄱湖貧當陶令猶餘菊悵望湘君未
有夫我亦杖藜峰頂立瀟瀟風雨滿平蕪

秋望迴文

峰高盡處立秋清久望空愁有客行虹臥半橋斜隔
水鳥飛雙闕遠依城春聞薄暮村烟斷唱罷歸樵山

月明筇杖自來還復去東溪老對獨亭亭

西閣懷李弟

流水平池日日閒開門到眼卽青山雖無旨酒庶幾
飲每有良用況也歎深谷來春生細草遠天歸翼動
寒澗梅花欲放不全放留得一枝待汝還

李少賤自巖中見問口占代東

前月中秋日欲夕微風罷浴飲茶多不當愛月坐深
露遂使經旬抱小病草屋秋陰交大對竹窗疎雨動
衰荷兩山只恨無雲棧與汝任來一和歌

李孟遷雪中見過云以醫游寧化遂謁李元仲
二月春花生太息十年多病只蹉跎亦知宰相終難
作自恨方書集未多似汝不曾勞雨雪有人聞已老
松蘿欲擔簦笠隨行李莊孟相逢可奈何

送友人之秦步林確齋韻

王子獨身出家門綿水邂逅逢李君八九千里爲行
客二三月花開江村瑣瑣餘子融兼紀碌碌諸丘衛
與陳此去直上華山望東西南北更何人

艾煥要

十年抱病只深山簡得方書種藥關會起沈疴甘氣
惡肯辭束縛任身閒鍼縫已沒青絲綫汗下還添白
布欄莫怪盈要初服改須知此物卽幽蘭

辛丑五月寓新城塔下寺奉懷沈仲連先生在
肝

鬱孤誰望舊時春

崇禎辛巳先生司理贛州同諸子賦鬱孤臺春望詩

短屋寒

燈對石門一自故人爲遠客纔知夫子正長貧新城
對色全消雨古寺鐘聲半入雲欲到麻姑山下問蓮
花幕府隔江蘋

賊平後經頭陂墟市

秋艸秋花滿野田，平林盡處有炊煙。
輕裝已出荏苒，澤長路初逢蒹葭。
天鵝鴨籠中喧白瀨，兒童對下數
青錢。家家茅屋無門戶，結伴還過隔嶺眠。

甘健齋歸了溪索白桃對秧詩以贈之

白桃之對深山春，春晝山庭自閉門。
寇石以來四五歲，種自寇石移至梨花欲似雨三分。
疏泥布核長經手，截竹藏根短起身。
但向了溪溪上種，不教花片誤漁人。

壬寅春日奉送伯兄北行

弟自海南初息駕兄從冀北始行車經時執手臨岐
路正月開花別故廬燕市酒徒今尚在都人臺笠近
何如却愁南北連烽火目極秋鴻憶報書

同彭躬庵江上逢杜美吾烹魚見金

杜陝西人
住河南

廿年長臥翠微峰偶爾與君江上逢旱雨欲來村鼓
急高灘初下晚煙空秦關久已稱天府洛內今誰識
土中汝會烹魚能大嚼釜鬲曾有幾人同

壬寅六月初七日酷熱寓樟對通慧寺薄夜微

雨天涼睡美夢同伯季數人行縣市俄見數

騎來與人馬上左右拱手云是外國朝貢人
前二騎皆重冠故制形容甚偉季子曰盛觀
哉不可無詩余喜甚而悲不自持掩面大哭
失聲連床友人急呼余既醒氣上不能語攬
衣興席而作此詩

古對蕭條倚巨洲長江盡日只東流三分大業餘荒

寺

寺傳是三國時建

一夜涼風到竹樓有客夢中看白馬都

人方外識黃裴披衣獨向空庭立宿霧山山總未收

立秋日南州寄內

風雨同巢未肯孤多卿勸我適江湖何當馬舄空男
子自笑牛衣不丈夫極浦煙波秋澹蕩故山雲木夜
蕭疎遙憐思婦空閨裏最是梧桐落葉初

於廣潤門市桃食之而甘憶勾庭桃熟却寄舍
弟

買得沙桃色似銀寒泉素碗齒牙新齧根久誦鷄鳴
句殺士誰吟梁父人客舍暑風如坐甕山庭荷葉正
當門池邊嘉實今應熟却與秋猿一半分

會民門納涼一首

壬寅立秋日感
所見別有注

長嘯晚風倚郭門。騰黃抄白總橫陳。定知王猛非秦
相。纔識李陵是漢臣。木葉乍聞秋已怨。家書欲寄語
難真。可憐啼鴂先芳艸。天地無容置此身。

登五老峰

西控荆蠻南控吳。諸峰霄上托層圖。玄黃半合江湖
水。髻履雙浮大小孤。往日不堪多謬誤。臨風長自笑
頭顱。最憐星子城邊對行列。分明似藝蔬。

寒泉精舍懷石公兼酬元韻

在五老之陰

萬仞危峰勢接天。高頭處處有川源。老僧縣竹通香

積山鳥隨人啄菜園谿澗可登移客坐清寒如汝立
吾前自慚補闕傳茶論孤負匡廬第一泉

余性不飲茶石公送

行詩有此行定酌匡廬瀑試問何如石鼓泉之句陸羽品泉以匡山谷簾泉爲天下第一

赭山

江流千里盡黃塵南望赭山白晝昏煙草初逢八月
莫行人空憶五朝身野蒲當日專秦政深室何年見
衛臣翻羨洛陽行酒處抱頭猶哭故時君

登雨花臺恭望

生平四十老柴荆此日麻鞋拜故京誰使山河全破

碎可堪翦伐到園陵牛羊踐履多新草冠蓋從容半
舊卿歌泣不成天已莫悲風日夜起江聲

高郵九日奉懷伯兄將自燕都出塞

高郵雄鎮控南淮野水蒼茫沒草萊獨立自憐雲物
好隔船遙見菊花開燕山秋色餘金狄塞上悲風接
玉塔天地到今誰滯下幽州此日莫登臺

寄內

久客真令骨肉親長干誰是授衣人愁知雙雁雲中
呌又早孤帆江外分

時躬庵確齋留
揚州予獨之淮

夾路芙蓉連水

色西亭桂子一山聞重陽此日無風雨爲想深閨亦
閉門

寄舍弟和公兼憶諸子傑微

知汝只在孤峰住日日登臨見遠臯新豆初升嘗祖

妣

俗於九
日薦豆

故寇再拜領兒曹還家有夢音書斷極目

無山天水高惆悵不須人送酒蘆聲猶帶廣陵濤

白馬湖寄李咸齋彭中叔

邵伯湖連白馬湖田村洲對散鷗魚都無山色空平
遠直有煙光接太虛浮客身知同傳舍勞生道可在

舟車思君高坐秋峰裏細看清泉引石渠

淮陰寄門人賴韋兼酬諸生

聞說淮東形勢地三城萬瓦夾江濱小山賦後誰招
隱漂母祠前早閉門日月苦消行路客籃輿長憶執
經人茂秋木葉知多少掃逕相遲薜荔村

漂母祠寄葉外兄

後有鄧侯前有母王孫從此上青雲伏兵忍滅無辜
士進食能留不歿身相國終須慚老婦舊恩翻令感
今人閒中憶汝平生事多少塵埃欲報君

韓淮陰侯釣臺

欲問韓侯垂釣處，荒臺遺碣在通都。
能酬一飯真君子，不報睚眦大丈夫。
坐待鳴鐘烹走狗，終教雉滅諸雛。
淮流千載猶嗚咽，祇是將軍死不辜。

咸齋云三四於詩雖非高調然議論精確可署淮陰廟聯

所得淮陰心

咸齋帝齒酸

其二

韓侯能貴子陵隱，兩漢爭傳兩釣臺。
雲夢旣囚甘斧質，富春終去臥蒿萊。
成功不處嫌疑地，長傲須知歿

禍階何事舞陽迎道拜狂言大笑出門來

弟云詩以議論傷其風格然末四語可作淮陰論斷

劉峻度邀同林確齋邗溝放船登述樓故丘時

秋水大漲

邗江風物動高秋出郭還同陶謝游
溪水半淹芳草路柳門平泛木蘭舟
天空極目惟殘照客老狂歌有
傲裘復檻層樓何處是翩翩寒鳥下荒丘

酬陳集生

芒屨傲葛到西陵邂逅梁溪詩酒生
軍檄甫成全愈

病胡琴未碎久知名風吹湖水新羈旅日落吳山舊
帝城那更誦君頭白旬夜來心緒已縣旌

宿陸梯霞小齋

兩年擊楫渡龍江屐履誰當更擅場已見愛兄同趙
壁豈徒過父似貞王

兄面京蒙難以梯霞營救得不死

一燈影落庭

如水四壁蟲鳴夏欲霜惆悵桑陰人未遠終宵反側
臥匡牀

贈陳貞倩

短袖科頭指未曾從來小禮近虛名修期退賊兼能

賦子厚爲儒已論兵似我眼中人未老憐君髀裏肉
還生嚴裝好向屠沽處醺酒班荆話洛城

負倩專閩河南時所

辦多豪俊
士故及之

靈岩懷古

獨倚斜陽望翠微讓王陵說此峰西四方爭戰何年
息萬古高情後世疑樵采未能希柳下行人無處識
松枝可憐簫鼓村村急齊賽前林五顯祠

靈岩禁石
碑稱泰伯

墓在山側欲往
拜無有知者

太湖波濶洞庭秋少伯曾聞此汎舟白水誓疑師子

犯赤松游已教留侯山空落月鳴寒鼓天外悲風動
客愁縱使當年同賜劍何如石室共包羞

納妾酬朱靜庵

十年抱子計全疎夢語憑君占已符令女昔曾傳絡
秀名山今又傷麻姑

妾姓李氏
南城人

風開桂子秋庭晚雨

綴櫻桃春對初他日翠微湯餅會此功那得說卿無

新城九日寄內

藕花初放別荆扉又是黃花欲放時細雨侵堦秋草
綠空山無伴夜烏飛歌聞肅肅宵征句

時余方慰汝
納妾

雍雍抱子詩

壬寅余卜安江南內人送行詩有此日願言得抱子雍雍歸故鄉之句

不知還健否看花曾一到南池

庚戌九月雨後重登燕子磯見伯季舊題悵然

有懷

怪石孤亭立太虛江山無恙獨愁予不知故國幾男

子剩有乾坤一腐儒東壁數行留雁字西湖八月斷

魚書

時伯季在浙

重陽最是多風雨兩地登臨總未殊

題藥地大師雨花臺望鍾山圖贈趙少尹

憶昔登臺遙望拜空山紫氣尚葱葱

時陵樹翦伐已盡已勞

下土三年夢竟寫高人尺幅中破格古來難聖祖

奇才今又屈馮公

洪武中南豐尉馮堅上書稱旨立擢都御史

滄江直下

烽烟隔安得乘流一向東

見龍夫人人音體詩喜而和韻爲山居之作

金精峯外白雲低石徑苔痕印鹿蹄絲裊晴空風斷

續竹敲清夜雨離迷匏瓜吾已同芻狗土室人今似

木鷄華韜何曾來熱客木香花下有新題

木鷄字犯題重出以

屬對芻狗稍

工遂仍之

附錄○夫人姓賀氏永新孝廉科寶之母也題云雪中念科見長安公車之詩曰作八音體以

思之詩曰金鞍續夢月初低石路霜濃滑馬蹄
絲冷輕裘風面面粉圍古寺霧迷迷曉樽注酒
分僅僕土屋開屏見犬鷄革去寒威春到眼木
樛詩向杏花題按夫人此題共二十首客僅傳
其一
云

酬王又逸傲藥地大師金精翠微圖見贈之作
誰識翠微真面目居然寫入畫圖中高僧草閣他時
見處士寒窗今又逢一石當空懸日月千山飛瀑動
蛟龍知君親入巨然室落紙雲煙自不同
又逸學四
于藥地
客廬陵山中懷伯兄在廣東季弟在贛

嶺南嶺北多烽火
木月誰通一紙書
龜角無人敢逐

鹿羊城有將解騎豬獨逢客舍寒梅放共憶天涯大
被虛最是難真消息處光陰又早偏年除

雪中寄世傑

西閣梅花放幾枝應逢凍雪壓前墀愁予客路無聊
處憶爾寒窗獨立時朝夕過庭諸父遠烽烟滿眼報
書遲且尋濠泗真人傳莫問當今江漢詩

東宋牧仲員外

秋晚尋醫過賴江使君遲我讀書堂風吹北院清歌
隔時副使者雨灑東窗夜話長蘭薄交新渾似故橋

盤坐久不聞香最憐出語關民瘼手把醇醪未忍嘗

拜楊文正公墓

有序

清江楊文正公廷麟以丙戌殉義贛州遼東賈將軍收塋之事詳崇禎御書記往禧求公塋處不獲已未九月就醫泰和過贛得從賈公子尋公墓而拜之因遂有詩蓋其家人十年無至者矣墓臨西河上規制甚微在楊梅渡灘兒下楊秀亭

卽庠大靈

王廟右百步有碑

荒塚斜陽亂草青布衣此日拜門生長年愧戀忠誠

府亘古神依箕尾星兩畔蓼花紅有淚一江秋水澹
無聲孤魂最是難聽處盍旦枝頭徹夜鳴

魏叔子詩集卷之八

五七言絕

寧都魏禧水叔著

男

世侃直士編次

門人歐陽士杰遜萬較

己亥七夕

庭宇虛無人涼風吹獨夜寥寥星漢明肅肅梧桐下
石牀云絕不言其所以然而躍然言下絕調也

鵲暑故毛希新毛秋未長毛落不成橋隔河空佇望

弟云意新語古比興深妙

大夏不相留噫茲歎廣澤莫言會面難一歲一來卽
邦士云於章法中作一折自好

東家有寡女未嫁天三夫曾許一夫嫁不知今在無
弟云哀音奇語苦境添情

恒愁不見君相見益愁思却美月中人千年貞不字
兄云新雅勝嫦娥不嫁人語更有味

弟云只是西廂到不如義斷恩絕意却說得妙怨
望最深五首自道情事苦節堅響于古今七夕
詩別開

一格

山猿八首

日日山猿來羣呼度木杪小猿扼老腹捷於兩飛鳥
我倚曲闌前山猿對我嬉足躡桐樹根手弄荔支子
桃花山荔支秋至一齊實赤似夏中榴黃如霜後橘
我昔行山中山猿望我走如今觀朶頗不畏口戕口
晨桃露未晞乘露呼童采人在樹頭立猿行樹下待
山中日逐猿旋去旋來卽我但控拳呼虛聲亦何益
梧桐垂屋陰桃子枝相屬汝但食吾桃無當敗我屋
桃子落高枝老猿向地覓得桃不自噉持與小猿食
賦得老驥伏櫪志在千里 四首

有客自來言能觀黃驪色驂騑在廐中三過不相識
督儒狗已往華士誇將然千里果何爲空聞年復年
中叔云處士虛聲久矣上者如武侯比管樂鄴侯
枕天子膝大言果驗次如樊英种放之徒上下失
望下則王半山秦繆醜欲作宰相矣未可輕以皮
相詆人

驚馬駕鹽車終朝不百里但向車下生寧伏櫪中死
中叔云龐士元蔣公琰不治百里蕭何謂韓信雖
爲將必不留是也

傳說穆天子西行到弱水王良執左綏觀汝日千里
中叔云淮陰登壇諸葛就聘空談寔用有目盡覩
矣寧伏櫪中死開終南捷徑如許
弟云四詩凡四折開合相生古意可味

題畫竹二首

根傍石爲骨枝因風作姿吾家有道士慙嫌正同時
葉重不垂地石空疑出烟還將葉上雨滴作石根泉
丙午三月十一早夢伯兄蘭花數枝甚高大鎖
置房中而無水余爲插洗筆池內寫詩于案
云

幽谷自多水空房今病渴可憐漢司馬不見秦時月
卽事

幽林初上月斜照曲闌于雨歇蕉猶響夜深山欲寒

晨起過兄山閣不值留題

朝日明清林竹烟散石戶主人愛早起曳杖何處去

春夜

春陰漠漠散庭柯近水偏知寒氣多最是離人能不
寐東鄰夜夜叫羣鵲

竹枝辭

曲曲花陰一逕通綠牕深處有輕風坐來細雨疑人
至荔子牆頭落粉紅

竹總文几淨無塵欲寫新詩且避人難字記來無覓

處笑將詩草問郎君

燕尾斜飛雙翠鬟花塵風漾拂春山
偏嫌翠鳥留泥印坐看丫頭洗畫闌

白石闌干紫石屏愛郎詩好背郎聽
于中讀到烏啼曲淚落羅衫聽不成

同內子看梅

風微日靜自山家晝掩柴門向石崖
錯把杖頭高拂樹吹來兩鬢盡梅花

和韻詩

怪說秋天不肯明
攬衣永夜動雞聲
中原處處問烽火
得似深燈此一庭

賦得老驥伏櫪志在千里

一自歸休十二閑
秋風不上燕然山
長年燕市無人問
却使千金買骨還

中叔云漢文帝封驪而思廣牧朱理宗側席以褒
程朱古今買骨類此

金精七絕句

有女獨居空谷裏
谿頭無雨亦生雲
寒梅銷盡三冬雪
自有春風到石門

聞來日日浣紗津
朝向吳門夜越門
寂寞寒山一片石
何如家在苧蘿村

待得佳期啓石關
金牀玉枕雜烟鬟
却聞車馬空歸去
怪煞十年枉住山

老女長年不得嫁
辭家獨自傍寒崖
春風每向山頭立
不見何人車馬來

人間定有黃金屋
天上遙聞白玉堂
此日合將宮裏去
神仙還自住椒房

車馬不來芝草死
終朝饑餓坐寒谿
早知人事多乖

悞悔着山中薜荔衣

仙女原來天上住偶然遺跡在人間縱令閭闔無雲
路不逐吳宮車馬還

同日公過萬松坪

水石廻環欲亂雲萬株松木路中分離家一里三迷
路纔識山僧不出門

送友人歸黃山

送君歸住白雲間三十六峯任往還好傍當時遺劍
處年年風雨哭煤山

靈岩雜詠

靈岩高峙太湖東一望金銀映碧空
多少禪房花竹裏游人還說館娃宮

八月秋風動地來法堂雙桂正花開
人間自合無根蒂直得靈山頂上栽

法堂前有古桂二株扶疎
菟蔭獨憩樹下悲感欲絕

采雲初日樹朦朧複殿迴廊闢曉風
老衲也知興廢事館娃宮裏自鳴鐘

千山落日起寒雲夾道松風亂石門
響屧廊邊秋草綠空餘花色似羅裙

響屧廊一帶開
剪秋羅花甚盛

琴臺如髻繞烟鬟學得新聲手自彈七十二峯看不

盡烟波純浸洞庭山

西施琴臺縱望太湖湖中有七十二峯最勝者東西洞庭山

新宮十里隔花山采得鮮花行路難箭涇河開飛漿

到梳妝臺上掠雲鬟

吳王開箭涇河于花山采花爲西施助妝有梳妝臺

野草荒臺秋復春至今遺恨浣紗人應知越女傾吳

國不比楊花覆白蘋

後人每以西施太真並稱余謂西施越女有復仇之義與古今

女寵人國者不同

絕世佳人烟作身行來應不動香塵遺蹤那得深如

許石上青苔憎殺人

遺傷石有西施脚印甚可惜

吳江東下日悠悠稻蟹蕭條未有秋宮舍五千曾不

厭還將芥子盪龍舟

館娃宮凡爲舍五千四十八區又以芥子滿壑中競龍舟爲戲

松杉斜映洞門邊曾此佳人枕石眠却合山僧禪定

後舉頭剛對太湖烟

西施洞圓廣丈許面太湖今山僧坐禪於此

靈岩值徐昭法孝廉令子解衣贈之口占一絕

凍死不穿趙氏衣尊公嚴冷久相知過庭他日如相

問只道斯人住翠微

昭法非義不食非其人不食常絕糧有饋米數石至門者峻却

之

癸卯十一月客舍題壁

珍重天涯一敝裘
寒霜如雪壓行舟
囊中剩有江湖氣
歸卧西山百尺樓

真州候船

三月春花溪水頭
却逢冬盡客真州
江邊時見歸颿去
日暮天寒獨倚樓

二十六年不得江
思禹信忽自杉陽
訪予喜成絕句

桂子懷丹秋未寒
故人白袷赤纓冠
相逢未暇便相揖
執手牽衣仔細看

壽族母六十

夜夜烏啼伴此身那知竹實已垂門佳兒自愛三春日
壽母真爲萬曆人

和壽昌梅公石峽停舟

君已心同不繫船爲誰植權向江邊蘆花明月無人
渡露濕青衫卧碧天

催妝詩爲黃大宗迎李姬賦

寶鏡明明白玉臺烟鬟初整下花堦今朝定擬行雲
至不待安東避雨來

魏叔子詩集

卷八

本

躬菴云雲雨字雅切

送袁重其歸吳門

辛勤營塋出吳門可有麥舟逢故人歸去正當花落
後好教春燕共成墳

兄歸口占寄內

一雁南飛一雁留絨書和淚寄春愁傷心爲憶鳩啼
處春雨春晴芳草洲

躬菴云暗用鳩婦無跡

時發吳門送人歸休寧稱母觴

君向黃山我翠微
丹楓白雁布帆遲
羨君載得惠山酒
獨上高堂獻一卮

躬菴云羨字獨字有有母獨無之意悲而深故自無跡

舟泊儀真夢中忽得絕句

十五盈盈未嫁時
香肩雙鞦髻新齊
西湖堤上鶯初曉
楊柳千絲復萬絲

爲廻龍菴僧募鐘

有序

石壁廻龍菴在萬山
中山僧以耕鑿之餘
手剪荆棘獨建此有
鼓而無鐘余避兵是
菴丁巳初春大

雪與山僧煨榾柮因以爲論菴面翠屏高樹萬章
左右岡環抱流泉出其腋而當泰和廬陵永新諸
鄉之道晨暮鐘聲鏗然隨山壑轉往復行人耳中
足發深省抑亦可爲孤行之助夫佛像必左鐘右
鼓以此奉神兼有福德敢爲諸善人倡之詩曰
蒼山千曲白雲封古木寒泉面面逢不盡嬾殘煨芋
火只輸香積一聲鐘

客閒無事近體忽朕數日之間復大瘦生問焉
悵然用寄所思

蒲楊枝弱不勝衣盡道春來綠已肥何事鶉鳩啼最
苦鄉心一夜減腰圍

贈謝子實

手提藥裹歸山去一路寒梅盡放花莫說腰纏無長
物籠中饒有活丹砂

子實客中好
結友故云

桃花菴卽事

一陣香風簇馬蹄紛紛蝴蝶斷橋西眼中結習何時
盡天女飛花不著衣

春日卽事

棕鞋茶杖笋皮冠落日春風正暮寒竹裏桃花花外柳一池新水浸闌干

題畫秋葵海棠

天淨風微日正中秋葵花倚海棠紅那因聲色銷忠義試看當年郭令公

送陸亦樵游廬山時余亦南下

千頃波平趁曉風匡廬倒影入湖中低頭忽見振衣客恰在五峰第一峰

荊湖塔題壁

萬家烟火倚江東。赤縣神州此大風。獨上浮屠高處望。令人空憶沈崑銅。